

Cu cància a ştrata vecchja pâ nova...

Si-nnàsciu n'audda ota, ti purmièttu
ca iu ri ccari num-mi scugnu cchjuil!...
Tannu partii pi-ddàrimi rrisièttu:
rrisièttu ca pirdii ri tannu m-pui!...

Staju cuòmu n acièddu nta na rrama;
mi suònnu, tutt'i notti, a me vanedda;
ma, quannu u juòrnu arrièbbica, m'assama
sta smània r'acchjappari a vavaredda!...

È-bberu e-bbirità, jappi a furtuna
ca, unni a statu iu, li cristiani
ti rùninu la parma e la curuna,
siđdu ti sa manciàri lu to pani;

però - t'u uògghju riri n cunfidenza -
u pani chi ti rùninu ssi ggenti,
- luannu a ràzziè Ddiu e-ccu sculicenza -
manca ri sali!... sapi ri criscenti!...

Ma tu si ancora a-ttièmpu, e cci-àbbarari!...
U sàcciu ca la sorti nun ti luci!
però, fratuzzu, ascùtimi, n u fari!...
Tu mancu u sai sta ştrata unni cunnuci!...

S'ammatti ca ti miètti a zzanniari,
spirannu r'attruari u pani muòddu,
allurtimatafini, pò turnari
spiddirizzatu e-ccu a trarenti ncuòddu!...

Bbona pi-cquantu bbona ti po-gghjiri,
pò aviri corchi-ccosa ri cuntari;

ma lùştriu ri cannila nu-nni viri,
picchè ti sfilò cori ri turnari!...

E-ddimmi tu chi bbuònu stari è-cchistu!...
Campu ri spranza e spranza nu-nni viu...;
u bbeni chi-ccrria nun l'aju vistu...:
e-cchiđdu chi-lassai ora u risiu!...

Ulissi ddu pumiđda majulini...;
putiri iri a-ccicòria pi-mmineştra...;
nu bbumuliđdu r'acqua rí Rrubbinu...;
e-gghjiri a-bbinnignari, ulissi, aveştra!...

Ulissi na varata a-ppanarièddu...;
l'oru chi cc'è nnê çìuri ri l'alaştra...;
ulissi u vinu rú me carratièddu...;
e ncuntràrimi cu-ttia, nnà ştratamaştra!